

Xujun xi kits'inkjihí nda postru Pablo Tito

B'i ts'ín kikjaniñaha Pablo Tito

1 An Pablo, an nda musu síhin Ntíaná ko nda postruhu^a Jesucristo. Xi nkú ts'ín s'ejihín xuta xi j'ájin Ntíaná ko kamankjihín ni xi naxu tjin, kui xi xána, kui nga kui xutaha xi skuenkjühun Ntíaná. ²Tíchuyáá nga kuintsuba tík'un síáán. Kui niu xi kitsúya títjun Ntíaná kintehe ni nga kin'enda asuntee, ko yaá nga najmi maha b'anacha. ³Nd'ai ni ma, nk'ie nga ja tsichu chuba, ajihin én xi kik'aina nga k'uenjímía y'éjña chji Ntíaná ni xi kitsú. Ntíaná xi maha ts'ínk'ankiná kitsjána kui xóo.

⁴Tífaniñaha Tito, ji ntíng at'aha nkuhú xi s'ejinná. Kas'ehi kjuanda ko kjuajyu xi tsjáná Ntia Na'miná ko Jesucristo xi ts'ínk'ankiná.

B'i ts'ín kitsúyaha Pablo Tito xá xi ts'ín

⁵Kits'ink'íejñaha xjo Creta tu xi k'úéndahani ni xi kindyjat'a sa yo ko tu xi k'uaí xáha ri jácháha xuta nínku xi tjin xki nanki xi tjin yo. Kixinya chich'ihin ni xi n'ei. ⁶Kama s'et'a xá xi najmi tjin ni xi chubayanéhe ra, xi nkuhú maha chjuühun, xi tjihin ntí xi s'ejihin Ntíaná ko naxu incha ts'ín ntíhi ko nt'één.

⁷At'aha nku nda xi kuasehe nínku, kui xi tjñaha nga kúnnta ni xi ts'e Ntíaná. Kui xáha. Kui nga kas'et'a xáha nku nda xi najmi tjin ni xi chubayanéhe ra, xi najmi ngak'un, xi najmi stinta, xi najmi b'atihí nga 'bi binu, xi najmi kjánko xuta ko najmi mjehe toon xi ch'on ts'ín sakú. ⁸Nda xi ts'ínkjáin níhi xuta ni'yaha machjén, xi tsjoho ts'ín ni xi nda, xi nda basehe ni xi ts'ín, xi naxu ts'ín, xi benkjún Ntíaná, xi maha b'éch'oho yjoho ni xi mjehe animaha. ⁹Ni xi kuakúya tjihin nga ni xi tsangiya nibaha ra, tu xi b'a ts'ín kama tsjáníyá sisihin ra xuta ko kama k'ujéña chjihí já xi tífi kontraha ni xi bakúya.

¹⁰At'aha tjin nkjún xi ngji t'axíhin én xi naxu, xi tu a éhén ni xi bakúya ko b'anachaha xuta. Xi incha bakúya nga n'e ni

^a 1:1 “Xi kis'exá” tshu ra “nda postru” ko a ra “já postru”.

circuncision, kui xi 'yún b'a incha ts'ín. ¹¹Najmi ta k'ua_{antehe} ra nga b'a incha ts'ín jái, at'aha ni xi najmi tjíhin nga kuakúya tíincha bakúya. B'a tíincha ts'ín tu xi títs'ín ngana ndaha toon. Ja nkjin xuta ts'ínndyjajihin.

¹²Santaha nku nda profeta xi ts'e jóo b'a kitsú: “Xuta Creta én tsank'á nchja tehente. Ch'onk'un jóo xi nkúhu chu ch'onk'un, xuta ts'e xi najmi tsehe.” ¹³Kjuaxi kjáihin ni xi kitsú ndo. Kui nga ndjá chubakohoni jóo tu xi incha sku_e sisihin ni xi s'ejinná ¹⁴ko tu xi najmi ngjuénñjuhu ra én tiyaha xuta judio ko ta ndaha ni xi b'éné'yúhun já xi ngji t'axíhin ni xi naxu tjin.

¹⁵Je ngayjee ni xi tjin ko ma n'echjén tsa je tjíntuyá animaha xuta, tunga najmi tjíhin ni xi je ngat'a ts'e xuta xi chuntí tjíntuyáha ko xi najmi s'ejihin Ntíaná. At'aha ngasten ts'ínnkjink'un ko ja tsatsun kjuankjintak'uhun. ¹⁶Kui xi tsu nga be Ntíaná tunga ni xi incha ts'íhin bakúchji nga najmi be. Kui xi ch'onk'un, najmi nt'élén, ko najmi maha ts'ín ni xi nda.

B'i ts'ín kitsúyaha Pablo Tito xi nkú ts'ín tjíhin nga kuakúyaha xuta ninku

2 Tunga máha ji, takúyai ni xi y'aha ra ni xi nda ts'ínkoná xi tsinchiyái. ²B'a t'ihin já xi ja chá nga kixi incha katjiko yjoho, incha katenkjún yjoho, nda incha katasehe ni xi incha ts'ín, nda incha katumankjihin ni xi s'ejinná, ko incha kas'ehe kjuatjo ko kjuatsenta.

³Ko jminchjin xi ja chá b'a ta ts'ín incha katenkjún Ntíaná, najmi tu én tsank'á incha k'uasjené xuta ko najmi tu 'yún incha k'úi binu. Incha katakúya ni xi nda ⁴ko incha katsjányáha jminchjin xi kjintí sa nga ts'íintjo x'ihin ko ntíhi, ⁵ko nga nda incha katasehe ni xi incha ts'ín, nga je kas'entuyá animaha, nga incha kuasehe ni'yaha ko nda incha s'entuyáha, ko nga incha sku_{enkjún} x'ihin. B'a ts'ín chankjúhun éhen Ntíaná.

⁶Ko já istiu b'a ta t'ihin nga nda incha katasehe ni xi incha ts'ín. ⁷Ngatentee ni xi n'ei, nda n'ei tu xi b'a ta incha ts'íihin. Nga kuakúyai, katuma chji nga kixi tjíyahi ko nga tíyankjúin yjohi. ⁸Én nda katitju tsu'bai, én xi najmi tjin xi nkú ts'ín n'enijéhe ri. Kui niu xi ts'ín nga kama subaha ra já kontra, at'aha najmi sakúhu nkú ts'ín ch'on ts'ín kuinchjayanehená.

⁹Ko b'a t'ihin já musu xi kich'atse nga tehente katenkjún já ntíaha ko kats'ín ni xi sasíhin jóo. Najmi tjíhin tsa kuinchja tsa'ako jóo ¹⁰ko tsa ndyjé ts'íihin. Tu sa ní incha katakúchji nga ma ma 'yún k'aán jóo, tu xi ngayjee ni xi ts'íihin chankjúhun én xi b'éjña chjiná Ntíaná xi ts'ínk'ankiná.

¹¹Ntíaná ja y'éjña chjihí ngatentehe xuta kjuandaha, kui xi ts'ínk'ankiná ¹²ko bakúyaná nga k'úéch'oohó yjoná ni xi najmi je

nginkun Ntíaná ko ni xi nchjahá animaná ei asunntej, nga nda chasehé ni xi n'eé ko nga naxu n'eé ko nga chankjáán Ntíaná nk'ie nga tintsuba saá ei asunntej. ¹³Chúya sahá raá ma ni nda xi tichuyáá, kui niu xi nistjin nga chaá kjuachánkaha Jesucristo, kui xi Ntíaná xi chánka ko xi ts'ínk'ankiná. ¹⁴Kui xi kitsjá yjoho nga kin'ek'ien ngandaná tu xi k'uasjejihinná ngayjee ni xi najmi ndoo ko ts'ín je nku naxinantá xi kui ts'e, xi ngayjehe k'un mjehe ts'ín ni xi nda.

¹⁵Kui ni xi takúyai. Tjenniyáhi xuta ko n'ek'a niyái. Najmi tu jo jan katumahi nga b'a n'ei. Najmi tu ch'a xi tu tohón katumaha ji.

B'i ts'ín tsakúya Pablo xi nkú ts'ín tjíhin nga incha ts'ín xuta ninku

3 N'ek'áitsjeihin xuta ninku nga katenkjún já tíjuun ko já tjíxoo. Incha kant'é'éhen ko incha kat'entu nda nga incha ts'ín ngayje tíkjá ni xi nda. ²Ndaha nku xuta najmi tu ch'on ts'ín incha kuinchjane ko najmi tu ch'a xi kjaánko. Nda ní ts'ín incha kas'eyaha. Ko kate xuta nga nimakjua incha tjíntuyáha.

³At'aha nistjin nk'ie ta tu xí sináá. Najmi kinu'yá'één, ngakjá kin'enkjíntak'aán, ko nkjin tíkjá ni xi nchjahá animaná tjí'yúhun ñá ko ni xi mjehe yjonintená. Kjuakjan ya ko kjuaxintak'un tintsubajián. Kits'ín unkiená xuta ko b'i ngján kin'e unchaá xinkjá. ⁴Tunga nk'iehé nga kis'ejña chji kjuandaha Ntíaná xi ts'ínk'ankiná ko kjuatjo xi tjíhin, ⁵kits'ínk'ankiná. Najmi ngat'aha tsa nda tjín ni xi kin'eé, tsa kui kjuaha nga b'a kits'íhin. B'a ní kits'ín at'aha kama nimaha ñá. Kits'ín jená nk'ie nga kits'ín tsin tsetse ngáhaná ko Espirituhu kits'ín tsetsená.

⁶Tu ngat'aha ni xi kits'ín Jesucristo xi ts'ínk'ankiná, najmi kits'ínxkín Ntíaná nga kitsjáná Espirituhu. ⁷Ko tu ngat'aha kjuandaha Ntíaná kits'ín nga naxu tsichu maá nginkun. B'a kits'ín tu xi n'ekjáhín raá ni xi tichuyáhaá, kui xi tsuhu ra nga kuintsuba tík'un síaán.

⁸Ma n'e s'ejin én xu'bi ko mjena nga takuyái sisin ni, tu xi xuta xi s'ejihin ra Ntíaná ts'ínkjas'eheh ra yjoho nga ts'íihin ni xi nda. Tu xí ndahá tjín ko basinkoná nga b'a n'eé. ⁹Xi mjehe nku én k'uésintjáíhi, tiyú t'axíhin. Najmi tu n'esihin xi b'ésiyáha ntje chá xi y'aha ra ko ta ndaha xi b'ésiyáha ko kjántjaihi kjuatéxuma xi kin'ekjas'eheh Moise. At'aha najmi basinkoná kui kjuastiu ko najmi tjíhin sin.

¹⁰Xi kuakjánya xuta ninku, chubakoi tsa nku ko tsa jo niyá tjíhin. Tunga tsa najmi ts'íinsihin, najmi ta k'uaíntehe ra aya ninku. ¹¹Yai nga xi b'a títs'íun, kui xi ja kits'ínkatsún suba yjoho ko niyáha ngatitsuun tsú'baya. Ta kuihi tífiko yjoho xi má nga ndyja.

B'i ts'ín kitsúyaha Pablo ni xi mjehe nga ts'ín Tito

¹²Nk'ie nga ts'ínkjísehe nda Artema ko a ra nda Tikiko, n'e kitsa xáíhi yjohi nga nibáasení nanki Nikopoli. At'aha ja tjíndana nga yo

ts'inkj'a nistjin chunch'ón. ¹³Nda t̄isinkoi nda Zena, nda xi nechjantjai xuta, ko nda Apolo, tu xi ts'ínndjuúhu niyáha ko tu xi najmi chumi nihi xi ndyjat'aha ra. ¹⁴Katangiya xuta ts'añá nga ts'ín ni xi nda ko nga tsjáha xuta ni xi machjéhen. B'a ts'ín incha saájihin ni xi ts'e Ntíaná.

B'ǐ ts'ín kits'ínkje Pablo xujun

¹⁵Títs'ínkjihí kjuasuniña ngayjee xuta xi tjíntukona ei. Tjeihin kjuasuniña xuta xi tjohó ñá at'aha nkuhú xi s'ejinná.
Ngatento kas'enuu kjuandaha Ntíaná.